

Edisi Kedua 2024

MITASA
KESATUAN KAKITANGAN AKADEMIK UNIVERSITI TEKNOLOGI MARA



Suara

MITASA

Bengkel e-TUIS,
bantu kesatuan
lebih efisien

Risiko psikososial
tempat kerja:
ke arah menjadikan UiTM
sebagai majikan yang
sihat dan selamat

Usah aniaya anak buah,
jawatan adalah amanah
dan keadilan

Kenapa Susahnya
Nak Naik Pangkat?

PTM beri pendedahan
kepada pensyarah baharu

Insentif Kecemerlangan
SPM terus bantu anak
ahli MITASA

ISSN 3083-6116



9 773063 611009

Permulaan yang sempurna

Tahun ini kita menyambut Hari Kemerdekaan kali ke-67. Namun perlu kita akui bahawa pembentukan Malaysia adalah pada 16 September 1963 yang diaggotai oleh Persekutuan Tanah Melayu, Sabah, Sarawak dan Singapura. Kemudian pada 9 Ogos 1965, Parlimen Malaysia telah sebulat suara bersetuju akan pengeluaran Singapura daripada Persekutuan Malaysia. Sebagai negara yang mengamalkan sistem politik federalisme, ini adalah satu proses yang biasanya akan berlaku; bersatu atau berpisah.

Kita juga mengakui bahawa rakyat Malaysia mempunyai latar yang pelbagai seperti agama, kaum, budaya, bahasa, dialek dan banyak lagi. Tetapi ini bukanlah kelemahan kita atau penyebab utama kita tidak boleh bersatu malah bertelagah diantara satu sama lain. Semestinya kepelbagaian ini adalah satu keistimewaan dan kelebihan kepada negara jika kita bersatu padu.

Malaysia pernah melalui peristiwa hitam yang seperti rusuhan kaum pada 1964 (Singapura) dan 1969 (Kuala Lumpur). Insiden ini jelas menunjukkan betapa rapuhnya perpaduan dikalangan rakyat pada ketika itu dan kurangnya usaha oleh pemerintah untuk menyatupadukan rakyat. Hanya setelah berlakunya insiden 13 Mei 1969, pemerintah merasakan Malaysia memerlukan satu ideologi sebagai panduan dan menjadi asas kepada gagasan kebangsaan Malaysia. Maka wujudlah apa yang dipanggil 'Rukun Negara' sebagai panduan dan pegangan rakyat Malaysia.

Perlu diketahui bahawa lima prinsip utama Rukun Negara ini memerlukan penghayatan dan usaha yang bersepadu diantara pemerintah dan rakyat. Seperti yang pernah diungkapkan oleh Prof Emeritus Dato' Dr Abdul Rahman Embong, bangsa baru memerlukan rupa dan nama yang jelas agar difahami oleh rakyat. Menurut beliau lagi, takrifan 'Bangsa Malaysia' telah dinyatakan dengan jelas oleh Tun Abdul Razak pada 12 Julai 1971 di Parlimen Malaysia.

Semasa mengusulkan Rancangan Malaysia ke-2 dan Dasar Ekonomi Baru (DEB), beliau menegaskan agar perlu diwujudkan Bangsa Malaysia untuk kepentingan bersama dalam membangunkan negara. Pada masa inilah, Angkatan Belia Islam Malaysia (ABIM) telah ditubuhkan secara rasmi pada 6 Ogos 1971 di Fakulti Pengajian Islam, Universiti Kebangsaan Malaysia (UKM). Sejak itu, ABIM telah memainkan peranan yang sangat penting akan usaha pembinaan Bangsa Malaysia melalui pelbagai program dan inisiatif.

ABIM adalah sebuah gerakan Islam yang sangat berpengaruh ketika Malaysia melalui fasa zaman kebangkitan Islam awal 1970-an. Kajian yang dilakukan oleh Dr Norazlan Hadi Yaacob mendapati bahawa impak seterusnya adalah apa yang dipanggil sebagai Islamisasi pada tahun 1980-an hingga 1990-an. ABIM juga telah mempopularkan tasawwur Islam sebagai addin atau Islam is the way of life menurut beliau lagi. Kesannya kita dapat lihat sekarang seperti pemakaian yang menutup aurat, sistem pendidikan Islam, ekonomi yang bebas riba dan banyak lagi.

ABIM dan Pembinaan Bangsa Malaysia

Akmal Hisham Abdul Rahim

Pensyarah, Fakulti Sains Pentadbiran & Pengajian Polisi (FSPPP)

Sejak awal penubuhan lagi, ABIM telah mengambil sikap terbuka dan sederhana berasaskan realiti setempat. Visi ABIM ialah "Membina dan Memimpin Tamadun Khayra" dan setiap ahlinya perlu mengamalkan "Budaya ABIM" iaitu menghayati budaya ilmu; menghayati amalan kerohanian; menghayati amal shura dan amal jama'iyy; memahami dan melibatkan diri pada isu semasa; dan menghayati ruh-jihad fi sabilillah.

ABIM sehingga kini pernah dipimpin oleh 11 orang presiden. Ini adalah proses lazim dalam organisasi tersebut di mana transisi kepimpinan ini berlaku dengan kerap kepada generasi yang lebih muda. Salah seorang daripadanya merupakan Perdana Menteri Malaysia yang terkini iaitu Dato' Seri Anwar Ibrahim. Beliau adalah presiden ABIM yang kedua (1974-1982). Ini jelas menunjukkan bahawa ABIM telah berperanan sejak awal lagi dengan memberi buah fikiran serta memberikan solusi yang terbaik untuk Malaysia.

Pada akhir kepimpinan Anwar Ibrahim di ABIM, beliau mengambil keputusan untuk menyertai Pertubuhan Kebangsaan Melayu Bersatu (PEKEMBAR) atau lebih dikenali sebagai UMNO. Ini sekaligus memberi ruang kepada beliau dan ahli-ahli ABIM yang lain untuk proses Islamisasi sebagai pemerintah ketika itu.



ABIM dan Usaha Perpaduan di Malaysia

ABIM sejak awal lagi telah memberi solusi serta melibatkan diri secara langsung dalam usaha perpaduan di Malaysia. Ini dapat dilihat dengan tajuk Ucapan Dasar Presiden ABIM iaitu “Islam-Penyelesaian Kepada Masalah Masyarakat Majmuk” sempena Muktamar ABIM ke-7 pada tahun 1978. Dengan mengambil kira kemajmukan yang ada di negara ini, langkah utama haruslah ke arah penghakisan aliran perkauman sempit dan chauvinisme menurut Anwar Ibrahim.

Malah beliau turut menambah bahawa perlu ada persefahaman yang berlandaskan kepada prinsip tolak-ansur diantara setiap masyarakat. Kesepakatan yang dipersetujui ini sewajarnya dilaksanakan dengan jujur tanpa mengorbankan prinsip-prinsip seperti akhlak dan keadilan.

Dalam Muktamar ABIM ke-47 (2018) pula, Presiden ABIM dalam ucapan dasarnya yang bertajuk “Malaysia Baharu: Mengangkat Aspirasi Rakyat, Memartabatkan Amanah Umat” ada menyebut:

Anjakan Malaysia Baharu menuntut rakyat membasmi dan menghapuskan ke akar umbi sebarang prasangka yang cuba mencari dan mencemari keharmonian hubungan antara kaum dan agama sebelum ini. Sudah sampai masanya konsepnya kewarganegaraan (Muwathanah) bersandarkan kepada kesaksamaan (equality) dimartabatkan. Model kewarganegaraan Sahifah al-Madinah yang dibina berdasarkan ‘nasrah wata’awun’ (bantu-membantu dan berkerjasama) harus dijadikan sebagai kerangka rujukan utama. Pembentukan Bangsa Malaysia dengan ikatan persaudaraan kemanusiaan – ukhuwwah insaniyyah – merentas perbezaan antara bangsa dan agama harus diformulasikan dalam era Malaysia Baharu.

ABIM dilihat masih konsisten dan terus memberikan penyelesaian dalam pembentukan Bangsa Malaysia ketika era Malaysia Baharu. Walaupun begitu, kepimpinan negara ketika itu seakan-akan tidak serius dalam pembentukan Bangsa Malaysia. Ini dapat dilihat apabila isu melibatkan politik negara yang melibatkan parti politik lebih mendapat perhatian pemerintah. Tidak sampai dua tahun pemerintahan, Kerajaan Malaysia Baharu telah jatuh dengan perletakan jawatan oleh Tun Dr Mahathir Mohamad dan tidak lama kemudian, dunia dilanda wabak Covid-19.

Usaha ABIM ke arah Bangsa Malaysia menjadi lebih serius ketika dipimpin oleh Muhammad Faisal Abdul Aziz. Beliau adalah Presiden ABIM ke-10 dan memegang jawatan tersebut selama dua penggal (2019-2023). Dilahirkan di Ipoh, Perak dan beliau juga pernah menjadi Presiden Persatuan Kebangsaan Pelajar Islam Malaysia (PKPIM) antara tahun 2009 sehingga 2011. Muhammad Faisal dan kepimpinan ABIM ketika itu komited dengan memberi nafas baharu kepada pengertian Bangsa Malaysia.

Ini kerana pemimpin politik negara selalu memberi tafsiran yang negatif melalui kaca mata kepartian dengan mengatakan bahawa konsep Bangsa Malaysia akan menghilangkan identiti kumpulan dan identiti kumpulan majoriti akan menjadi lebih dominan. Sekaligus tafsiran ini akan memberi persepsi bahawa konsep Bangsa Malaysia hanyalah sebagai propaganda politik tertentu.

Namun Muhammad Faisal tegas mengatakan bahawa konsep Bangsa Malaysia yang ABIM perjuangkan ini bersifat inklusif, sederhana dan diterima semua pihak. Bangsa Malaysia mempunyai identiti yang pelbagai atas bingkai kesatuan serta bersama memerangi isu seperti kemiskinan, rasuah dan konflik.

Berdasarkan laporan aktiviti yang dibuat oleh ABIM dan Institut Reformasi dan Politik (REFORM) pada Januari 2022, ia telah menggambarkan sikap proaktif organisasi tersebut untuk merealisasikan gagasan tersebut. Secara keseluruhannya ABIM dan REFORM telah menganjurkan empat bengkel dan 13 program telah dijalankan dengan jayanya.

Inisiatif pembinaan Bangsa Malaysia ini juga telah mendapat sokongan 40 badan dan organisasi seperti Majlis Belia Malaysia (MBM), PKPIM, Adab Youth Garage (AYG), Sikh Punjabi Movement of Malaysia (GBSM), Majlis Belia Orang Asli Malaysia (MBOAM), Friendship Group of Interfaith Services (FGIS) dan banyak lagi.

Dalam merealisasikan gagasan Bangsa Malaysia ABIM telah meneroka pelbagai ruang serta peluang. Antaranya dengan menganjurkan Kem Muhibah melibatkan belia dan pelbagai kaum sebagai peserta. Tujuan utama kem ini adalah untuk memupuk kesedaran dan pengalaman konsep hidup bersama sebagai Bangsa Malaysia. Pada tahun 2019, ABIM telah bekerjasama dengan Persekutuan Persatuan-persatuan Lembaga Pengurus Sekolah Cina Malaysia (Dong Zong) dengan melibatkan 76 pelajar selama tiga hari di Sekolah Rendah dan Menengah Islam ABIM Sungai Ramal Bangi, Selangor.

Kem Muhibah berkenaan telah membuka ruang kepada para pelajar untuk mengenali antara satu sama lain. Tidak dinafikan Kem Muhibah ini mampu menghakis persepsi stereotaip dan prejudis dikalangan etnik dan kaum di Malaysia. Sesungguhnya generasi muda Malaysia perlu diberi ruang dan peluang untuk mengenali serta berkomunikasi sesama sendiri agar perpaduan Bangsa Malaysia dirasai dalam kalangan generasi muda.

ABIM kini telah beralih kepimpinan. Presiden terkini adalah Ahmad Fahmi Mohd Samsudin untuk sesi 2023-2025. Tidak dinafikan bahawa proses pertukaran kepimpinan ABIM kerap berlaku dan semakin muda tidak sama sekali melenyapkan semangat dan idealisma aktivis ABIM dalam memperjuangkan isu-isu tertentu seperti pembinaan Bangsa Malaysia. Presiden ABIM terkini turut menzahirkan komitmen untuk merealisasikan Bangsa Malaysia di era Kerajaan Malaysia Madani. Usaha pembinaan Bangsa Malaysia mempunyai harapan cerah sekiranya terdapat sinergi di antara pihak Kerajaan dan badan bukan kerajaan seperti ABIM.



Untuk sebarang urusan berkaitan akses terhadap MITASA, ahli-ahli boleh mengikuti kami di platform media sosial MITASA dengan mengimbas kod QR yang disediakan seperti Tiktok, Facebook, Instagram dan Twitter. Bersama ini juga disertakan kod QR untuk pendaftaran sebagai ahli dan borang aduan untuk ahli yang memerlukan.

Media Sosial MITASA




Tiktok



Facebook



Twitter



Instagram



Laman Web

Keahlian & Aduan



Kemaskini Keahlian



Borang Ahli



Borang Aduan



Siti Fatimah Awang
Setiausaha Media dan
Korporat MITASA
010-9280262



**Nadra Sharfina
Ab Rahman**
Setiausaha Pejabat MITASA
018-2365130